

# 40 vloaz Diwan poltredet ha deskrivet

**E miz Kerzu 2017 e oa bet lakaet er gouloù ul levr divyezhek evit lidañ 40 vloaz ar skolioù Diwan, *Diwan : D'ar skol ! 40 vloaz / 40 ans* e ditl, embannet gant Locus Solus. E-tro mil luc'hskeudenn zo ennañ, graet gant Ronan Le Penne, e-tal skridoù evit kinnig pep skol, savet gant Jil Penne. Pennad-kaoz gant ar skriver.**

E-tro 1 000 skeudenn a gaver el levr savet evit lidañ 40 vloaz rouedad ar skolioù Diwan.



## Penaos out en em gavet o skrivañ evit al levr-se ?

Diwar ur goulenn graet ouzhin gant Diwan, evit lidañ daou-ugent vloaz ar rouedad, ha gant an embanner Locus Solus, lec'hiet e Kastellin, eo bet skrivet al levr-se ganin. Fellout a rae dezho embann ul levr gant pep a foto hag a destenn evit holl skolioù ar rouedad. Ul levr brav o doa c'hoant da gaout ha n'eo ket un albom evel ma oa bet evit an tregont vloaz. An embanner a faote dezhañ gwelet al levrioù er stalioù e penn kentañ miz Kerzu, a-raok an Nedeleg. Sañset e oan d'ober al labour dindan teir sizhunvezh da gentañ, met graet eo bet dindan pevar miz hag adlennet gant Anna-Vari Chapalain, renerez Diwan, ha Stéphanie Stoll, ar brezidantez. Ul labour daou viz leun eo bet en holl.

## E-tro mil skeudenn zo el levr. Penaos eo bet aozet al labour skeudenniñ ganeoc'h ?

Gant Ronan Le Penne, luc'hskeudenner e Plougerne, eo bet graet al labour skeudenniñ. Skoliataet e oa bet e Diwan betek al lise. Anavezout a ra mat Diwan neuze. Graet en deus tro Breizh ar skolioù, ar skolajoù, al lise ha graet en deus ur bern fotoioù dispar, disheñvel-mat diouzh ar re a oa bet graet evit albomoù an 10, 20 pe 30 vloaz Diwan. Ur gwir labour arzel zo bet graet gantañ. Me 'm eus graet tro ar skolioù dre bellgomz nemetken.

## Penaos 'poa c'hoant da ziskouez skolioù Diwan el levr-se ?

Diskouez liesseurded Diwan a oa bet

goulennet diganin. Kavout a rae din e anavezen Diwan. Evit gwir em eus gwelet e oa liesseurtoc'h eget na soñje din. N'eo ket bet diaes kavout traoù dibar evit pep skol. N'eus ket div skol Diwan a vefe heñvel. Bet on e darempred gant o renerien hag o c'huzulioù skoazell. Selaouet em eus ar pezh a lavare an dud diwar-benn o skol, an tuioù dibar ha brav, hag ar mareoù diaes ivez. Klasket em eus skrivañ ar gwellañ posupl ar pezh a oa bet lavaret din. Lod, e-touez tud ar vugale pe ar renerien, a gave dezho n'o doa netra da gontañ, met a-benn ar fin e veze atav traoù dic'hortoz a bep seurt da gavout en istor ha buhez pemdez pep skol. Kontet ez eus bet din kalz traoù brav hag ivez ar stourmoù o doa ranket skolioù zo kas da benn e-pad bloavezhioù a-raok bezañ anavezet en o c'humun. E lec'hioù zo n'eo ket echu ar stourm c'hoazh. E-skoaz an dra-se eo bet aes-tre e lec'hioù all gant un degemer a-feson ha youl a bep tu.

Ouzhpenn ur pennad evit pep skol e kaver, e penn kentañ al levr, un diverrañ eus istor Diwan. Kinniget em boa diskouez ar rouedad en un doare pleustrek, pezh na oa ket bet graet kement-se a-raok. Penaos ez a en-dro ar skolioù a zisplegan neuze, gant ar c'hevredigezhioù Deskadurezh Pobl a ver an arc'hant, ar c'huzulioù skoazell a rank klask arc'hant. Anv a ran eus budjed Diwan, eus an implijidi ivez... Ar pajennoù-se em eus bet plijadur o skrivañ anezho. Talvoudus eo evit an dud a faot dezho gouzout penaos ez a rouedad Diwan en-dro evit gwir.

## Evit piv eo bet savet ar skridoù ? Evit ar skolidi, evit o zud, evit ar re n'anavezont ket Diwan ?

El levr e vez rentet enor d'an holl a labour evit Diwan, gopret pe a youl vat, ha d'ar vugale ! Met soñjet 'm eus ivez kalz er re n'anavezont ket Diwan hag a lavar "Diwan zo e-giz-mañ pe e-giz-se". Liesseurt-tre eo Diwan, pep skol zo emren ha kalz emrenoc'h eget na soñje din. Pezh zo boutin eo ar soubidigezh e brezhoneg hag un nebeud traoù all zo e Karta Diwan a gaver el levr ivez. Evit diskouez pegen emren eo pep skol : ne veze ket atav an anvioù mat gant sez ar rouedad e Landerne evit pezh a sell ouzh an dud a ra war-dro ar c'huzulioù skoazell pe kevredigezhioù Deskadurezh Pobl.

Ur gevredigezh eo Diwan, ur burev hag ur c'huzul merañ zo, servijoù zo evit ar rouedad e Landerne met tud ar vugale eo ar re a ver pep skol a-benn ar fin ; perc'henned int war o skolioù en ur mod.. Ne ouien ket e oa ken pouezus youl ha nerzh tud ar vugale e buhez o skolioù, ha dreist-holl evit klask arc'hant hag ivez evit kengred ar rouedad. Pal al levr a oa ivez e vefe lorc'h en dud gant o skol, ha reiñ skouerennoù da bep skol, evito da c'hounit un tamm arc'hant. Hag evel-just e vo leun a eñvorennoù brav evit ar vugale gant fotoioù o c'hlasoù !

**Respontoù dastumet gant M.L.**

*D'ar skol ! 40 vloaz / 40 ans*, Jil Penne (skridoù), Ronan Le Penne (skeudennoù), embannet gant Locus Solus. 20€ an tamm.

Evit gouzout hiroc'h : [www.locus-solus.fr](http://www.locus-solus.fr)